

Wer ämol lied..

E Birschelsche, cirka elf bis zwölf Johr,
de kläänschd vunn all in de Klasse,
unn deshalb unn gradselääds dodefor
spielt er Hansdampf in alle Gasse.

Sei Geldungsbedürfnis is groß - wie er klään.
Er will doch aach emol JEMOND sinn;
bei de onnere im Middelpunkt stehn.
Doch wie kritt ma das nur hin?

Er iwvaleed unn mennd, er hat e gudd Idee;
so kinnt er sich Freinde gewinne,
wenn er's Neischde immer wisst - unn oft noch meh;
die dollschde Geschichde kinnt er erfinne.

Die erschd Zeit hat das funktionniert.
Er hat sich gefiehl't unn war froh.
Unn hat dann immer weider unscheniert
sei Komerade hinne unn vorre beloh.

Geflunkert hadda, was es Zeisch gehall.
Awwer bald honn se ne durchschaut.
Münchhause hat ma ne genennt iwwa-all.
Kenn Mensch hat em meh vatraut.

Sie honn ne nimmeh ernschd genomm,
ob's wohr war, was er saht, odda nit.
Wenn er mit Vazehle hat ohngefong,
honn se all e Lachkrampf kritt.

Im Summa hat die Klass e Ausfluch gemach;
sie sinn gewonnert durch Wald unn Flur.
Plätzlich stehn se omme brääde Bach.
E alt, schmal Holzbrick fiehrt eniwwa nur.

Unser Liejebaron wollt de Held jetzt sinn,
is iwwa das morsche Gelänner balongsiert.
Es gebbd e Krach! Im Bach leida drinn!
Alles lacht, es Malör is passiert.

Er war nass wie e Katz unn hat geschrie:
"Hilfe! Hilfe! Ich vabrenne!"

Im Wassa vabrenne? Das gebbd's doch nie.
Er lied doch widda, ma misst ne nitt kenne!

Der kräaschd. Die Komerade lache ne aus.
Kenner hätt denne eraus gezoh.
De Lehrer holld ne schließlich enaus.
Jetzt sidd ma: Diesmol hadda nit geloh!

Er zwängt sich aus der Bux eraus
unn hat doch tatsächlich owwe am Bään
e Loch - sitt wie e Brondwunde aus.
Jetzt komma sei Gebrill vaschdehn.

Er hat, wie das die Buwe so mache,
im Buxesack gesommelt so allerhond;
unna onnerem war bei denne Sache
zum Experrimendiere e Tiedsche mit Kalk, ungebronnd.

Jetzt hadda plätzlich im Middelpunkt geschdonn,
wenn aach nit ganz so, wie er's hat wolle honn.
Äämol kunnt er die Wohrhääd sohn!
Es hat awwer aach aarisch weh gedohn.

Unn die Moral vunn da Geschischd:
Wer ämol lied, dem glaabt ma nischt,
unn wenn er aach die Wohrhääd sprischd.
Das wollt ich nur sohn mit dem klääne Gedischd.

Helene Keller